



處實堂續集卷之四

丙

丁

續

起撰

書

復詹叅岳汝欽書

長洲張鳳翼伯

起撰

叅軍家叔南歸傳至手教再拜啓緘如奉顏面且知蔣都
闡一書已徹記室欣慰家叔淪落下吏故業蕩然雖以公
役猶在中阪負鹽車乃荷頰念舊雨兼敦年誼枉駕臨卑
遂令窮途更爲周行感恩頌德不獨家叔一人也

與同年許叅岳德夫書

別經廿載無緣瞻覲懷想何如曩歲使節臨浙表弟荷推

屋烏舉家感戢未由申謝邇者家叔以木役經魯復辱賜存夫以卑卑下吏匍匐風塵翹首臬府何異天漢而吾丈獨敦年誼頹眙款曲用意仁厚求之古人中已不多見矧世情若今時哉弟自委棄泉石無一善狀日惟上奉老母下訓弱息聊以自娛長兒玄星學習禮經僅能成章亦知孝敬次兒玄宿亦課以禮稍能記憶計通家見念如文者所樂聞敢及之

復劉子威僉憲書

承惠鴻篇獎掖踰實令人捧誦愀慙汗津津不能當然語語莊騷左國自是文中照乘足為芸堂光第方稱介老母

且十襲篋笥俟歲杪春初當高懸誇耀光寵耳

荅林向甫書

丁應心憲使歸訊老師起居始知賓仙灑淚千里外不得効執紼捧土之役重負知己捫心如何向得瞻接足下眉宇時尚可提抱已露頭角迄今三十年於茲尚斂健翮豈天將老其才以大其用耶望之望之弟以母老安命家食久不赴公車舊嘗以子嗣為憂今已得二息大者十五稍能課文小者九歲亦善誦讀足慰目前人間功業毫無能建當時老師國士之語竟虛每一念動不覺心熱如何如何挽章率爾所謂言不盡意厚愛者幸為藏拙老師遺集

之賜寵踰百朋附謝

荅王太史書

猥辱來使遂得大序弁諸新編譬則左思借譽皇甫當令洛陽紙貴幸甚欣甚兼拜氊衣惠及老母佐以白鏹恩周弱息知門下締交敦契雖餐氊斷金莫踰貞堅環念周迴感戢無量第隔閣相思發於寤寐無以自慰耳委收雜帙先以若干種登之鄴架餘俟從容續覓并刻序書聯再上報慶新編少展一二已自奪目坐燕冗不能卒業容更復也

荅吳幼安書

曩辱顓使頒翰飛觴佐以腆貺雖登堂拜母之厚何以踰此竊計同鄉書以來倏忽二紀中間升沉存沒歲變時更上者登九列下者守半畝近得士立見寄新刻齒錄則婺源汪卿泰興張丈又復化爲異物夫升沉異致旣以興懷幽明殊塗能不增慨然則弟與丈之曳尾未必不巋然曾靈光也強効達人知命以此自快不知高明以爲何如夢熊之兆計在早晚種玉旣成勿靳相聞當爲丈臨風一舉酒耳留都諸同年亦時時聚首否伯祥鳳儀於辟雍汝文鵠立於郎署伯恒鷹揚於藩臬懋承奮翼於象賢正伯辭榮於刺史與國解組於明府懋脩發軔於雲夢中間赴公

車者僅僅弱侯一人耳惟汝文使吳伯恒入浙得一周旋
餘則不相聞問久矣回視疇昔能不爲之依依倘有晤便
幸以名勿靳

復朱儀部書

復春自白門來傳致手教兼拜精貺緣乏便鴈關焉久不
報以辜尊者之賜竊惟下走掩關以來十年於斯卽明公
下臨隣邑未得走一介具一啟上交乃荷藪菲之採諄諄
下存三復昌言蓬藿生色明公去思之德勒於口碑書囊
之名籍於都下下走不得躬承幸采而幸遙奉咳唾自慶
多矣茲因舍弟入都附候台吉并致謝私伏惟俯鑒至荷

荅太常許公仲貽書

賤子雌伏草莽株守閭巷不得脩候者忽復三年於斯乃
荷不遺走使半千里外錫以瑤華兼之珍幣再拜啟緘曷
勝神馳我公碩德厚望隆洽海宇師柱熙世更老辟雍疇
云匪宜乃錫杖靈壽枕石東山巋然爲鳳城靈光殿固知
山中有相塵寰有仙也賤子母老子幼年力向衰自應沒
齒曳尾大章束句乃不容翠微中着一張生耶一笑獻弟
月初已有留都之行乃并荷教及想尚未登龍也

謝許職方書

憶自曩歲與處元同在京邸閱佳卷相與歎賞而別不浹

旬放榜吾丈登第弟卽驅車南下便有雲霄泥塗之隔迨
弟不赴公車又數年餘不啻無緣瞻對卽欲通一牘亦如
仰望蓬山動爲風引懸懷何如邇者乃荷飛瑤章重申年
誼爲家慈稱百歲觴且揄揚溢美蓬藿生色雖登堂拜母
之義何以踰此謹成一律少布感私登之扇頭并新刻二
種呈覽弱息玄星玄宿學習禮經欲得大作數首以爲矜
式公餘得檢昔稿命侍吏錄寄幸甚

復韓少宗伯書

曩士立自金臺寄至壽軸則旣首借尊銜爲老母光寵未
及申謝嗣荷瑤篇輿貺顯使飛書啟緘捧誦光耀庭戶尊
登八座款念故舊幸於今日復覩古人登拜感戢無可云
喻謹九頓以復

與沈太僕純甫書

向承枉駕失迓迨走河畔復不得一覲顏色抱歉至今如
何可言近讀士氣一疏乃知長孺不敢獨步叱湯詈息何
以殊此雖未得堯俞而公論則大快矣雌伏野人不覺擊
節大叫也

謝張侍御伯大書

往歲獻弟得廁登龍之末獲奉三鳳之評承之厚顏啣之
入骨時緣明臺方肅風紀闕焉不報殊非本心茲緣下委

仲氏俯徵俚言漫成一律仰復嚴教巴渝下里曷揚潛德
采對采菲其在兼收

復沈郡公書

向率爾簡去辱不以爲野人譴重而錫之珍編感愧奚似
鈎玄提綱挈領不獨成一家言有神後學不淺所賜時義
卽付兒曹雖未敢躡等課習亦令知所仰止半閒亭稿啟
緘便知是開元以上人第未及卒業耳犬子課數首附呈

復王太史胤昌書

接手教兼拜新刻精緝無異奉丰範且聞從吉旣久仙舟
將駕辟則豫章梗枿自當棟隆明堂柱石清廟豈容効樗

撒老山林爲匠石所不顧耶慰甚慶幸甚老母誕辰重荷
寵錫温若春陽榮踰華袞不能顯一力叩謝媿也紀夢之
編借大序爲重業已登梓敬以三部并文選一部同上天
池茶二樽適入山採至兼爲使者行李累犬子長者已十
六宮詹徐丈嘗兒子視之學課文敢以數首呈書記非敢
望廁桃李末行倘得賜咳唾俾通家子私淑於千里外亦
無異登龍門也尊座主趙公垂眄最深近於其晉擢北上
不及具一緘攀送悞恐無地計會面不遐幸以賤名外小
詩登扇用見鄙忱統冀覽教

復林文學書

足下重名教敦儉素躋丁鴻讓爵李固遊學無以踰此豈不稱翩翩佳公子哉若而人者非僕所願神交而不可得者耶而不遠千里走書貺徵詩爲太君壽旣薦葑菲之采不遺芻蕘之言僕何敢以不斐辭謹撰一章以復尾續之誚知所不免也亦所願承也

答袁文毅書

僕雌伏以來似與人間隔絕庸知有鴻臚者矧得其使爲門下致書哉幸不至浮沉耳門下罹太夫人之戚亦坐不知茲旣知亦不能買一葉越疆而弔附致香一束臨風叩首殊不成禮如何如何尊先公祀名宦雖出輿論然在門下乃家門大快慶事僕誼屬通家自當揄揚盛美第來使立俟率爾操觚不足塞白幸爲藏拙

荅陳玉叔方伯書

辱惠書以隱操見許僕何人斯而敢斯之承若景玄苔草良復似之長孺山鳥或可比跡然非其人也往歲仲氏傳致閩教命作扁書倥偬寫就附仲氏啟中嗣欲顯緘奉報而鴻鼓翼矣然野人懶慢亦真爲大雅所原也名勝未得神遊不能懸爲題詠適便旋又以鉅工之委不敢率爾應酬姑作宿適容徐徐課上如何武夷詩追古作者山靈有知當欣欣色喜雙龍之編與二鳴並傳海內古稱同調豈

虛語哉至巴人下里本不足灾木而陰陽名利之說尤是
口舌罪過道廣如門下乃復有葑菲之采耶

荅王胤昌太史書

教言諄諄不獨無虛歲且無虛月深哉念布衣如門下也
惠貺之厚情誼兼篤雖嚴仲壽母亦不踰是竊自附於周
之則受之義其何敢辭又何敢稱報哉缺陷一說言言參
透上乘吾儒不忮不求之理便欲磨片石手書深刻
以永其傳惜來使恐行李不勝且不能待耳夢占一書冠
以大序遂不至覆瓿即門下源源取用亦當供輸矧紙值
之給耶謹附上十二部其板俟此後有便不妨命使載去

既已借重祈在必傳在洛猶在吳也報慶編及諸記向擬
翻梓而未得頒式計此後當有帝京等作統編見寄繕寫
入錄并夢占板雷上如何大書刻石俾下走得廁名不朽
幸甚兼一聯上不足揄揚皇恐豚犬初學預荷獎掖啣戢
無地文選一部乃用純料綿紙雙上烟墨印成者與通行
者絕不同可存鄴架其堆紗補則老母督弱息製成爲尊
夫人獻輒并扇上小詩付之歸鴻非所云荅也聊以展忱
也

荅沈問卿純甫書

兀焉枯坐經月不出戶戶外事絕不聞每奉懷丰範計大

隱在滁陽山水間不意謝病作東山遊青雀道吳未得候
謁地主不知愧慙而令過客不愜媿也前題來兩軒未必
能勝諸君書門下自采葑菲耳茲委一一課上中有疊幅
者候高明擇之然苦無佳管城致不能佳非不欲盡中也
解醒一記奚啻駮乘醉翁且當令六一虛左舉世混濁清
士乃見嗟嗟斯言信不我欺然僕猶虞其見耳湖筆領惠
俟試後更復此後有便幸為僕特製大者二枝小者三枝
須令多着羊毛而以兔毫領之在好不在多也拙刻五冊
附呈中多口舌罪過非布衣諸生所宜幸有以教之

荅李侍御書

賤子賦性孤介禮文多闕卽明臺虛懷折節獨敦古道然
自下車之日以及攀轅之辰中間已再易寒燠沐澤則深
而咨覲亦罕迨明臺移鳧避驄聲溢千里而賤子斷鴻虛
鯉未展寸忱思緣日積罪與媿并仁者寬之幸矣幸矣乃
荷不遺飛翰見存兼之賁錫開緘九頓承以愧慙遭逢云
云自明臺憐才之雅在賤子則揣分自安上侍老母下撫
二息竹栢可以息陰禽魚足以爲侶誠不知爲焦勞也明
臺策名熙朝公餘淡藻弘業偉章當並成千載又奚俟下
問之勤倅旋附復辭不罄感

序

吳淞漫稿序

今之摘藻者疇不驚竒誕瑰瑋哉乃若循矩矱尚悃悞以
寫其感槩發其隱憂無俟鈎竒抉異令齷齪束人口而言
言實証實悟者其人可想也顧其人用則其言在輦轂其
人不用則其言在猷畝在輦轂則側陋乃揚在猷畝則嘉
言乃伏握治綱者所當加之意者也吾友俞子如弱冠卽
膺鄉薦數上禮闈垂二十年僅僅獲一第倘重誦信者孰
不以一鳴斥爲懼哉乃子如官刑曹甫展采卽以鋤莠黜
歸而佃作承嚴君歡於海上泊如也顧雖在猷畝不忘其
君憂則有若不能自釋者乃隨感觸發之聲詩惘雨暘則

屋漏之賦作病華靡則巾履之言奏慕靖節之風則貧士
之咏和感雲長之烈則建祠之記成達生死得失之故則
還書之記輕重之說著其他停雲來雨選勝紀遊質而韻
腴約而旨永不逐時趨不詭古調而各臻佳境非所謂實
証實悟者耶夫以言獲罪而獲罪後復不能無言其言則
異其心則同也何也言者心之聲也惟其在輦轂而心猷
畝故能輕榮枯在猷畝而心輦轂故寓諸聲詩與隱而忘
世者異讀是編而知子如之可以不在輦轂而輦轂之下
不可以無子如明矣子如不事家人生產作業暇則時時
汎舟吳淞江之上相羊容與殆無虛月不識子如者多呼

之爲吳淞先生故以吳淞命稿云

馮躬甫幼科輯粹大成序

夫醫之難言也久矣說者謂帶下醫難於老人醫醫小兒難於醫帶下非謂婦人不盡言則難小兒不能言猶難耶吾友馮君躬父家世業醫吳中號稱幼科專門所與錢氏陳氏相頡頏者也乃躬父則生而穎異不屑世其業業佔俾弱冠卽爲督學使者高第弟子無何而廩於宮且將大其拯物療民之用而每試棘闈輒報罷於是則抑而姑以世之業小試之試輒驗由是吳門凡有小兒病無論甲族窮巷爭迎躬父躬父隨應之檢故方而損益療之其有裨

益於吳中兒不淺鮮矣且懼無以衍其傳也爲之纂而成帙命之曰幼科輯粹大成卷凡十類凡六十有奇會集群說羅類諸方不嫌於畧撮綱領采精英又不厭其煩允乎大成之云匪僭也允乎亡羊之訝不足憑而菜菔之諺可明徵也夫以躬父之明彥旣能以窮經之緒餘推而爲小兒醫則必能以小兒醫之旁通者推而爲帶下醫爲老人醫他時脫迹黌校拜命通籍又詎不能推其所旣驗於醫者老老幼幼起民瘼而躋之安全之域哉則其所以紀旂常銘鼎鐘者當更有在不獨是編之永其傳也予竊有望焉是爲序

記

大椿堂記

俞子如先生之以抗疏黜家居也葺其曩所讀書處以奉其尊及結社於其中顏其堂曰大椿夫大椿以八千歲爲春秋卽人稱上壽者亦僅僅以百歲計胡人之可椿哉庸詎知人之大有大於椿者在全其已定之天延其無彊之年而已始子如以弱冠登鄉書其尊人不欣欣以喜迨上春官輒報罷至其所同登鄉書者已登樞要而子如僅僅一明經竭來公車其尊人不戚戚以悲癸未之歲甫成進士去登鄉書之年二十有三年矣居官纔八月而以直言

黜一歲之間榮悴不齊而其尊人不欣欣亦不戚戚日惟與數名流壺觴於斯倡和於斯第令子如以輿論起廢卽拜清要計其尊人之所壺觴倡和者亦恒於斯有不知老之將至者是莫非全其天也且也子如旣以振士風明職守矯矯自表見而尊人又能盍簪星聚逍遙塵壺之表將俾後世譚香山五老洛中十三耆英勝事者指不再屈而及此堂此堂之名且垂之不朽則其人亦與此堂俱不朽其年固不延而長有不啻以八千歲爲春秋者又烏知人之不爲椿也耶椿之不爲人也耶是爲記

傳

王長公傳

長公姓王氏諱穉豐字有年其先爲毘陵之江陰人先世姓烏有金安公者從巨璫下西洋歸而喪孀懼不免乃避地吳門以子真贅王氏遂冒其姓真生洪洪生景宣景宣生軒娶於蒯是生長公長公故潛德弗耀以有弟曰穉登爲詞林翹楚寔由長公克其家俾厥弟得肆力於文章以成其名人故緣厥弟以知長公云長公爲人深沉周慎寡言笑鮮嗜慾然多心計佐乃翁起家致溫厚翁未老卽謝家政而令長公任橐鑰長公權其竒羸謹出入翁是以得優游琴酒間以終其天年方倭夷由海道寇蘇常趙崗書

來視師有司以乏軍興得罪者接踵毘陵富人不能役多竄去長公獨不竄時奉牛酒餉諸軍諸軍以長公長者爲少戢然家亦用以旁落長公弗恤也長公性至孝母氏病湯藥躬調匪嘗不敢進時極熱蚊蚋罔知避雖吳猛手不揮蚊不是過矣如是者三月弗懈及母病竟不起哀毀幾滅性父沒亦如之初王氏丘壠在梁溪而翁故樂居吳治命於吳卜吉壤得梅灣地宅兆畢遷母氏自梁溪合葬焉鬱乎佳城不讓原氏阡矣長公皆有力焉長公從兄老而貧姊老而寡悉衣食之寧自斂媼黨待舉火者數十家太史公云君子富好行其德其蓋謂是乎長公有子曰承謨

爲大司成高第弟子行且昌大其門閭然則俾長公食其報於身後者將不在是耶

野史氏曰予讀兩漢書見陳曲逆家貧好讀書有田三十畝伯兄獨耕縱使游學當時稱陳丞相者因以賢其兄後二百年而得馬伏波兄况謂援大材當晚成遂從所好迨援立功名圖雲臺人亦因以知况嗟乎士苟可托以垂不朽奚必身樹千秋業銘鐘鼎立旂常而後爲名高哉若王長公動與厥弟殊致然卒能敦友愛任厥家政以成其弟之名而身亦爲鄉閭所推重雖謂今之陳伯馬况誰云不可

贊

高文學時化像贊

曰高陽永苗裔顯厥祖六龍衛卜居吳百餘歲肇文學始尚志身旣潤面乃粹心智囊腹經笥處隱居出用世玉樹承孫枝侍挺靈椿篤仙桂

李詹簿像贊

厥產維揚厥質琳瑯或出或處可行可藏揮麈烏衣之巷寓意紫羅之囊遊遨輦轂逍遙江鄉導引祖老氏之玄經著述紹鄴侯之縹緗庶幾乎謝統綺之習而登大雅之堂者與

彭美徵像贊

此美徵彭君像也市隱而愛文居華而尚質慕倜儻之風而力不從心抱軒岐之術而名不迨實幽致則相如之琴心高懷則劉伶之酒德雖非彭宣之徒可入馬融之室其斯以為吳門之逸

朱隱君伉儷像贊

此八十三翁朱君暨配汪碩人像也瞻其儀鄉邦之耆觀其妃室家其宜擬鹿門之偕隱若會稽之齊眉刑家則萬石之醇謹內助則百里之屢屢儼堂上之二嚴撫膝下之三芝頌折檻之風於祖德行考亭之澤於孫枝庶幾乎葛

天氏之遺有唐氏之黎歟

汪禹又像贊

昔爾逢曰於辟雍鬱乎眉峰其九疑之芙蓉今爾逢孰肖爾容皓乎其翁其徂徠之蒼松阜爾詩筒奚羨乎素封隱爾墻東奚待乎高墉秀五芝於玄澗之藜茂五桂於竇林之中是亢爾宗爾目其瞑於幽宮

陳長公像贊

此陳長公像也偉乎其度充乎其容匪泰而坦若傲而恭胄遙敬仲風傳元龍派衍都下門高吳中擇術卑九轉之技窮經為二戴之宗青陽則鴻漸於士林皓首則蟬蛻乎

覺宮遇南洲之英豈必榻之頻下在江左之選共推床之
宜東琴酒不遺乎泉石城府寧設於心曾繞膝羅竇林之
桂屈指官泰山之松蓬藿巢雲不厭乎白屋絲綸計日奚
止於素封其斯以為陳氏之長公也歟

張長公像贊

偉爾顏環焉瑯玕脩爾髯飄然羽翰考不疚於內省徵無
礙於達觀咸家則謹人所易閱墻則忍人所難邁五桂於
燕山篤八龍於潁川方優游於泉石計閱歷於歲年胡朱
輪之弗待而素封之獨偏祈綸音於身後遺口碑於生前
吾於其下壽之未臻而因以觀夫未定之天

張進士像贊

唐八元周八士爾克長亦克類偉乎梗柎豫章之材儼乎
清廟明堂之器遊鳳城而剡薦既膺顧鴈塔而香名將記
暫窮經以埋輪遄澄清而攬轡豈惟昌大乎金吾之門閭
抑且不媿於文成之苗裔者耶

頌

紫芝頌為經師少叅杜公壽

煌煌紫芝疇植其根燁燁偉人肇基東原名高善斷仕筮
平反蜚聲玉階端委金門燦燦神芝厥色惟紫黃龍競耀
青雲媲美光生九莖齡延千祀氣和入室德比夫子於顯

芝靈協德帝庭匪披其圖亦握其形誰其象之唯茲德馨
九德三命爲藩爲屏若漢稱母未傳解綬鄉推典刑賓崇
黃者盍先五更宜采三秀善養是臻徵彼芝茂芝茂南榮
時及朱明稱百歲觴酌茲耆英謝樹繞膝竇桂連楹孫曾
羅拜冠蓋逢迎藐予小子曩厠都養傳經董幃附驥馬帳
顓蒙雖啟當仁必讓皓首於茲幸侍几杖舊遊楚蜀新風
鄒魯林間夔龍物外叔虎究心聖域歛迹公府垂裕遺安
貽謀篤祐清德彌劭雅操益堅掩關習靜端居守玄非松
非喬爲儒爲仙何偃何仰永永百年

偈

布袋和尚偈

肚皮裏包容得怕口袋裏着落不得口袋裏着落得怕肩
頭上擔當不得包容得着落得擔當得笑人不識那知我
是佛

墓志銘

孫氏墓志銘

始予與孫君敬植爲莫逆交也君方以業醫從封君劉先
生遊先生才君罄其術授之不啻若長桑之於扁鵲也迨
先生子貴又好爲東山遊病者艱迎先生則迎君代先生
治君視脉息酌天時藥之效輒奏於是君之名稱籍籍與

先生埒病者家爭餽遺君君罔計其豐嗇惟病是治卽罔有餽遺亦惟病是治然性故好客隨所得餽遺以沽酒擊鮮客至便下榻投轄或方對客為杯酒歡而迎者至則請若父主之不令客中罷也父亦僮多逸興能敬愛客第不問生產故及君臥病不能視人病則家仍食貧探囊中無餘金至死之日幾不能葬病者家德君咸相與謀曰君曩故活我輩而我輩可以君之死死之耶於是爭賻君君之子士宣亦從劉先生業醫未大行也而能竭其力辭諸家賻以畢大事時則隆慶辛未十二月十八日也君事親孝交友信仁以濟物廉不望報宜為天助祐而享年不永

人方惜之無何而病者家迎君之子視病藥之效亦輒奏其名稱復與君埒而諸弟亦振振能事厥祖克厥家人皆知君有子而不死矣方是時君之父年躋耆耄步履飲食如常若不知君之死也去君死之年凡十有三而後終君父諱燾字子成世為吳縣人生於弘治乙卯四月十八日卒於萬曆壬午二月一日享年八十有八配陳氏繼胡氏是生君君諱梓字敬植生於嘉靖庚寅八月八日卒於隆慶庚午七月廿一日享年四十有一配顧氏生五丈夫子士宣娶計士朗娶李士昭娶唐士吳娶錢士燦聘袁女一適郁夢詔士宣等卜以萬曆丁亥四月十四日舉大父柩

虞實堂續集卷之四
莫之於吳縣靈巖鄉梅灣山之原就君曩所葬處處其中而君仍爲之昭焉義不得舍君之父而銘君又不得以君先葬故未有銘而獨銘君之父於是合而爲之銘命之曰孫氏墓志銘亦猶南陽之稱原氏仵也銘曰
孫之爲孫思邈之業世猶存鬱乎松門子先考後同斯原鑿山足兮培雲根瘞吉壤兮以庇爾後昆

林母樊宜人墓志銘

初莆中林公之守蘇也菁莪樸棫之化彬彬焉某厠郡黌被甄拔爲高第弟子用是得公起居狀甚習當是時倭夷由海道不突吳地城中戒嚴公調兵理餉出入戴星或冒

風露與守陴者同寢食而饗飧寒燠罔有後時咸取諸宮中微廉之知有樊宜人爲之內助也迨公擢副廣憲某等送之江上公出公子見諸生謂某曰子遠大器異日必以文章氣節知名識吾兒毋忘通家之好哉某曰不敢問之知爲宜人出也自是以母老不赴公車雌伏草野無緣通候寥寥者數年於茲矣曩歲有客自閩致公子一緘始得公子名啟讀琅琅方喜公有子讀未竟而書杪以挽公辭爲委乃得公計不覺泣數行下其明年又得公子書則以詹使君所撰樊宜人狀介以薛使君書屬某銘宜人之葬夫當代徵文必於通顯斯足以光昭先德罕有及山澤之

臞者且也薛使君嘗以髫年受知公又雄文藝今又按閩獨不肯吐一言爲佳城輝煌哉而推轂某公子又惟使君言是聽越二千里走書幣徵文於某何哉顧某爲公門下士感恩最深二三年間一哭公再哭宜人獨不能以素車白馬効炙雞絮酒之虔則於斯委也又何敢以賤辭按狀宜人本江北人公官留都省垣時未有子求令族女爲生子計乃幣聘宜人爲次妃宜人旣歸於公任身就館得雄未嘗以自德事其嫡龔夫人效小星之義龔亦禮愛之迨龔逝乃總家政潔蘋藻睦宗姻御減獲和而有條嚴而不嗃公所敷歷廉訪左右轄宜人必從必慎扃鑰侍者不得

私市民一帛公治行卓卓政聲籍籍宜人有助焉宜人稟性醇敏不喜紛華暇則讀孝經列女傳旁及稗官諸書故雖身不踰閨闈而舉動有丈夫氣戊辰之歲公以血疾不起易箚時以子少爲念舉後事囑之宜人宜人啣哀理家扶痛撫孤喪以禮成族用敦睦課子力學俾隆師友雖孟之三遷陶之截髮莫過焉辛巳乃克葬公啟窆之夕宜人過哀嬰病竟劇公子謀爲醫禱宜人則曰公旣葬子亦克成立未亡人事畢矣何求生爲乃以篋笥所襲藏頒之宗戚至彌留時猶諄諄以勉學立行無替厥先爲公子囑宜人亦賢矣哉宜人卒於萬曆壬午二月有二日距其生嘉

靖甲午三月十四日享年四十有九男一卽東榮庠生娶
洪氏憲副女也女二長適徐明府子霑次適王大叅子德
泳孫男二長士賢次士賁孫女一葬之年月日則丁亥仲
冬廿又一日也地則公之兆之右也銘曰
生江北歸莆中篤厥胤延林宗寔克相我公哲萎辰龍吉
土是封玄宅之右爾與同是厚爾終薦辭用彤徽音其罔
有窮

華生夫婦合葬墓誌銘

予讀唐史至安金藏剖腸以明主雷海青慟哭以死賊敬
新磨滑稽以致諷未嘗不掩卷歎焉天下固有沾沾以士

行自喜者曾彼之弗若固知慷慨節俠之士九流衆技中
無不有之不可以方論也若華生非其人哉華生諱仁字
元卿爲南齊孝子之後其宗黨盛於無錫至生之祖嵩始
占籍長洲焉有子四人長曰賓配王氏是生生生生而秀
爽就外傳卽推其能文當是時其家故殷厚生得肆力佔
俾迨賓棄世家漸以落生出小試有司不售遂拂然怒曰
今之仕者優耳吾優而仕不可乎卽群里中游治子相與
習秦青之技不越月而能之且稱雄焉其宗有學士公者
聞其如是將召而櫟之孝子祠中而改其所爲而生不顧
也由是城之內外以及鄉邑凡召客必百計致生卽郡邑

大夫亦以得見生為幸由生有慷慨節俠之氣托優以自見故雖千載上下可合而為一人無異者固知孟之於叔敖非誣也然生自高其門閥又挾其技能視同儕蔑如耳又好美簪帽盛衣飾不屑與同儕同飲食有召生者每先家食以往至暮延生飲徹拂袖去人固以是啣之矣適河間輩有慕生而窺之者擲果焉而生惟好奢好俠不樂聞淫奔事實未嘗以琴心挑之乃有無賴子弟假托生而亂人室者生微聞之即棄去所為將客遊吳楚間以趨什一之利而朋儕惡其去已乃相與說其事籍籍燦金而生見捕矣是時郡侯方以風化為重不暇廉其事鄉邦士夫有

憐生者亦莫敢救竟死獄中先死之一日作一帋寄予纍纍千言大畧云公昔勗我以無美巾服而我不公聽勗我以無輕朋儕而我不公聽勗我以遠嫌疑而我不知遠負長者教死宜耳誠不敢惜七尺為明使君彰三尺法顧死後得長者一言以光寵吾幽唯吾諾吾目乃瞑付其邵倩懋文致之予予諾之詰朝懋文來則生計俱至矣可哀也哉生性孝友重然諾敦信義趨人之急惟恐後獨不能降氣下人以賈禍可哀也哉生生於嘉靖甲辰九月六日卒於萬曆壬午二月一日享年三十有八配陸氏生一女婿即懋文而以懋文之子某為後冒姓華氏夫賈克貴而顯

而心事則晦生貧而晦而心事則顯皆以異姓子爲後天
耶人邪生之及也陸氏蓬首垢面匍匐求救雖蔡琰乞疾
足於曹公無以踰此蓋亦可謂婦哉後生六年而卒卒之
日爲萬曆丁亥七月三十日距其生嘉靖丙午六月十七
日享年四十有二懋文卜以是年九月四日舉陸氏柩合
生之柩而葬之長洲縣武丘鄉之新阡來告於予予曰宿
諾也乃爲之銘曰

爾才則通爾遭則窮技之工而志獨雄是不令爾終而禍
罹爾躬佳城之豐伉儷旣同吾銘爾之幽宮斯封斯崇

祭文

祭宋秋官孝甫文

惟殷王之苗裔兮挺儒宗以發祥邁懿德以好修兮播芳
聞於郡鬻鷹鶚薦於京闈兮乃鴻漸於銓衡刺武岡之劇
州兮克慎勤以流聲歷獎薦以晉階兮貳衝郡於九江飾
江防以保障兮偉東南之長城績旣奏而內轉兮虛郎署
以延登佐爽鳩以平反兮雲司推其得中迨三載之及瓜
兮當明試於未央感秋風以思尊兮遄謝病而勇退匪雲
月之肆志兮懷廊廟之憂瘁詎陸賈之橐裝兮亦萬石之
遺智擬起家以卽拜兮胡爲乎丁此凶也雖稀齡之旣陟
兮亦筋力之尚雄也嗟典刑之已矣兮咸老成之是恫也

矧絲蘿之叨附兮痛喬松之云摧顧蒹葭之失倚兮攀玉樹而興悲覲靈輻之將駕兮儼音容於素幃感知已其莫作兮臨淒風以涕洟蕪清香以奠濁醪兮冀明神其鑒之
跋

跋沈啟南玉潭小筆

予生後啟南先生幾卅年而遙不及見啟南先生予家去玉女潭四百里而近未嘗遊玉女潭因此卷得神交先生又得神遊玉女潭何幸哉若其點染高妙詞翰古雅具眼者當得之牝牡驪黃之外無俟予贅也

跋書琵琶行後

予讀琵琶行而重有感焉夫在遷謫中送餞正毀譽易生之日乃因聞琵琶聲召商人婦彈之座上且爲作琵琶行傳播之見者不以爲駭聞者不以爲非樂而不淫有若國人不稱其亂者其風流率真可想也自宋季講學以來動欲繩趨尺步此事遂罕聞見卽有之則謗議滋起矣古今懸絕如是哉叔寶寫得是圖自謂逼古屬予爲書此行予時適有計偕之役未遑及也迄今廿年畫再易主偶得重閱忽憶宿諾漫爲書一過并志所感云

談輅續

世人多好名不知名成而毀隨之不若無名之全也世人

多好利不知利入而害隨之不若無利之安也是故仁者不近名君子罕言利

夫爭名者名必損爭利者利必奪故黃霸之聲減於治郡石崇之禍至於墮樓可不戒哉

今人營營謀利不知止足將爲身計則身之壽考不可知將爲子孫計則子孫之賢否不可必

知鬼神之不必有知則不當祈福知鬼神之必有知則不當爲非

瑚璉飾而闕焉不若燕砮之在璞也梗柎斲而小焉不若樗散之在山也故才有以不試爲長力有以不賈爲勇

火見日則熄火之不如日也明矣然隆冬濡衣見日猶凍向火則釋無他大而遠不若小而近也

君子耻其言而過其行猶云言過其行君子之所耻也此耻字直貫下朱註以耻其言過其行分作二項又以過字爲欲有餘之辭誤人不淺

孟子齊人章後云其妻妾不羞也而不相泣者幾希語意謂其妻妾不知求富貴利達之可羞是以不至於相泣耳誠知其可羞無異於齊人則不至於相泣者幾希蓋婦人語以夫之乞墦則知其可羞語以夫之求富貴利達則不知其可羞而就知求富貴利達之可羞固無異

於乞墦也何朱子漆一見字謂其妻妾見之而不羞而泣者少矣若然則求富貴利達者之妻妾豈皆老萊之妻梁鴻之婦耶大失孟子語意矣

前人言霍氏之禍萌於驂乘予以為在馮子都爭道時也夫以功臣豪奴敢與大臣爭道至擊御史大夫之門御史叩頭乃止其奴既不有大臣其主又何有於君則芒刺在背何待驂乘如此而不赤族未之有也豈待驂乘然後為禍之萌耶

漢人謂臣父清唯恐人知臣清唯恐人不知及子病不寐兄子病夜十起就枕輒寐此俱是吐露情實即所謂誠至宋人口口說誠而動占地步如此等語却少

王猛之於慕容垂知其必能興燕燕興非秦之利故始終勸堅害之至伐燕時以垂劍誑令使之犇燕亦是為秦計耳說者以猛嫉垂豈定論哉但燕之興廢垂之存亡秦之盛衰自有定數而猛欲以智術勝之是為不知命耳

唐肅宗靈武即位建寧賜死二事父子之恩已薄則君臣朋友可知且建寧賜死時上皇在蜀烏有父在而擅殺其子者又何有於故人鄴侯所以不受官而數數請歸者豈其無見於此哉

郭子儀之仁義可化強暴李光弼之節制可禦強暴方史
思明以十三萬人降假令命副令公或可潛消其叛逆
之志因借其力以平慶緒而寵以封爵移其兵柄何至
復反乃直以光弼之嚴繩之如追放豚能無反乎卽劉
展亦將才但當駕馭乃無故欲圖之更激成其反肅宗
將將如此非鄴侯在內郭李輩在外豈能成中興之業
哉

宋人於張公藝書忍之對譏其不以婦人不預外事諷高
宗何其持論之腐也夫公藝民耳身非大臣職非諫諍
可因問而進言乎褚遂良以先朝舊臣受顧命言出而
身死矣藉令公藝有言則朝發而夕及且將爲九世同
居之門累烏在其爲保家之主哉

陶淵明閒情賦梁昭明以爲白璧微瑕宋廣平梅花賦皮
日休以爲嫵媚語不知萬物僵仆四語豈果以嫵媚卒
乎何蕭之誤蘇長公議之而皮之誤未有人攻之者可
見作文固難論文尤難

嘗觀勸學文如云學則庶人之子爲公卿不學則公卿之
子爲庶人如云千鐘粟黃金屋顏如玉是未勸之學先
教之以計功謀利不知學之謂何而營營於此以此自
勉亦不過謂今之學者耳必如勿謂今日不學而有來

日等語始得學如不及之意

古人謂勞於求賢言求賢之難也今糊名易書則以記誦
僥倖而甚者至貨賂關節將鄉舉里選則以矯激釣名
而甚者乃干謁夤緣

科場命題多有見主司賢否底蘊者若張桂用事時方韓
二公以君子尚德二句富貴不淫三句命題便自寓不
詭隨意迨江陵握權時諸子相次登顯要隱然覲法曹
馬而命題者亦多以此類逢迎之此與褚淵王儉輩何
異其不為何點齒冷者幾希

予纂文選註既成客有持示一貴游貴游初不知為何書
及閱其目云張君誤矣既云文選安得復選有詩哉客
歸以語予予曰此事當問蕭君不干張君事也聞者無
不失笑

類書數種頭緒頗多若事文類聚本一書而又分為六集
尤為繁碎可厭予初意欲合數書為一書更加刪訂去
重補闕似於藝苑不無少益第早年中歲困於佔俸今
既遲暮精力不逮矣安得有後進好事儒者成吾志哉
萬曆丁丑以來文體漸變至乙酉丙戌間則專尚詭誕濫
觴極矣識者憂之無何沈大宗伯以士風日隳文體益
壞疏請嚴禁約以正人心謂取佛經道藏摘其句法口

語而用鑿朴散淳離經叛道以空虛不實講為妙以艱澁不可讀為工用眼底不常見之字為博聞道人間不必有之言為玄句句苟奇矣理不必通辭苟新矣題不必合青天白日之下而為杳冥翹翹之談皆切中時弊得旨着實舉行士風之變端有望於此疏可與孟子正人心息邪說詎說行放淫詞同功今時亦不獨時義之弊為然第大宗伯言未及之耳其作備其逐臭者當於平日之氣求之

讀何李集知二君少甚相得迨才望並盛各立門戶則李漸嫉何何不覺也聞何易簣時囑門人以集序屬李而相知者窺李之微竟不以屬殆亦有見文人自立門戶者喜人效其口脗便謂是他路裏人無論果是如何極口許可若各立門戶才望相埒必遭詆毀故有識者寧為却掃毋事游揚

座無尼父安辨顏回今人好議論人長短辟如身不在堂上而欲論堂下人曲直已為有識者所笑顧有疑心信耳者惟其所低昂而高下之何異矮人看場按圖索駿尤可笑也

文太史詩雖未必上超開元佳者亦不失大曆何後生小子疾其名高但據未選之集極口毀訾迨國博郡博之

作但謂之文家詩今觀壽承妾家住近江淹宅曾讀銷
魂別賦來休承五百年來幾摹本翠禽猶在最高枝等
句及張公善權二作亦各有致可盡警乎太史女嫁王
子美者更好學號為博洽亦能詩嘗作明妃曲有云當
時只擬殺畫工誰誅婁敬黃泉道卽收之彤管豈讓前
人

彭孔加清脩苦節和而不流至不嫉人所長不諱己所短
尤今時所難若詩文不無應酬而可傳者自居十之五
六身死之後諸孫既不克負荷而近梓一集又採瑕棄
瑜不朽之計將無可倚不知天之報善人何以若是薄

也

徐尚寶貞明議開懇中原荒地已有頭緒不知誰沮之竟
爾中止此議若成則不惟江南賦稅可輕而北方水道
旣通曠野旣田盜賊亦弭獨力任事卒無成功惜哉
顧禮部梁材初爲申政府同筆研友迨成進士卽以親老
得請家居數年終養謁選則申已當國顧猶以故舊自
處通眷侍教刺門者訝不欲通顧徐云第通之政府不
之罪出接以賓禮送之門視其登騎而從人知無此例
則騎已先引避矣賓主久待適行者以政府送客故避
下馬乃牽其馬與顧乘之旣別乃易馬而去當是時舉

朝嘲顧以爲不知體也獨不曰大將軍有揖客乎
桑落酒相傳是九月九日作水麴米皆以三斗爲準熟於
桑落之辰故名桑落不知西羌有桑落河出馬乳酒羌
人兼葡萄壓之晉宣帝時嘗來獻九日賜百官飲之則
此桑落乃地名非時也庾信乞酒詩有蒲城桑落酒又
似出於蒲州

予友顧名甫自常山學諭遷國子學正歸路經錢塘江夜
投宿店遇一舊識武林俞四者與之周旋同夜酌云此
舅家姓丘故代爲支客耳詰旦送之出門名甫抵家向
予言曾於江上遇俞四予故知俞四死已久適坐客有
方徃弔之而歸者共相視愕然無何名甫病作竟不起
然則所謂舅者豈柩耶丘者豈丘墓之謂耶

萬曆丁亥八月二十日半夜大雷越三日蔣少叅自角直
入城傳說其鄉一人載母同出借米得五斗歸至吳淞
江乘舟就江中洗手擠之入江人無知者歸已暮遇雷
雨便惶懼令妻以大缸覆已妻疑之因語之故語未畢
忽失所在明日其人擊死江岸與母尸相倚而口含母
乳孰爲天道遠哉觀此可爲不孝者戒
昔人謂石脾入水則乾出水則濕夫出水而濡物性然也
入水之乾從何辨之明理者可爲捧腹

北詞有黃鍾大石等調然不可以律南詞也南詞果有之則東嘉諸君當先為之矣何近時妄以八音分別若東風一夜冽一闕亦自豔逸卽以醉扶歸繼香羅帶啟香柳娘原無不諧而乃妄加刪削似小兒強作解語癡人翕然宗之又何異矮人看場

處實堂續集卷之四

處實堂續集卷之五

戊巳稿

長洲張鳳翼伯起撰

四言

倚伏詩

茫茫禍福循環倚伏何賤匪貴奚笑非哭塞翁得馬宋人生犢相以折脇師緣則足客卿乃入穰侯則逐在李難封若疏不辱寄言世人勿事逐逐知雄守雌為天下谷

賓鶴三章章六句題王大父別號圖卷

此予大父賓鶴翁別號圖

詠也元平則大父字也大父隱德弗耀而門外多長者車轍若文太史王別駕唐解元輩皆號為莫逆而張銀臺所稱忘年交者也大父庭泰二鶴賓至則舞賓退則與鶴相對若賓然因自號賓鶴而

諸公圖詠卷帙頗多此其一耳後多散失存者無幾子弟幼于敦尚先德偶遇此卷欣然購之屬予識焉予童年及見大父許以昌大門閭今不肖既負先子矣幼于則不及見大父得此卷猶見大父馬固宜珍襲以貽後之人與因為賦有鶴三章章六句

有鶴巢雲賓於薛園匪賓則仙維圖則存眷言先德以裕後昆

有鳥鶴鶴誰其賓斯考我祖德宜爾孫枝展思既遐出涕漣漣

翼翼飛鳥既鮮既皦我祖云徂歸彼華表爰瞻爰念期爾克紹

五言古

懶癖

懶性漸成癖經時不出門披衣若被鎧頂冠如戴盆况乃苦炎燭里巷兼災迤散髮謝應接日夕涉小園板輿時御毋慈顏開弄孫澄潭蔭藜薄撫景聊命尊

秋雨頓寒作

一雨連信宿秋氣倏以深兼之北風涼露重寒蟹吟時序有代謝感茲傷我心安得服大丹毋令霜鬢侵

古意

子輿不殺人慈母固見疑叔子不為醜敵國乃信之孰謂敵國親甚於賢母慈忠信豈異德疑信乃若茲知否不足

虞實堂續集卷之五
論所遭自殊時

憂旱

仲夏興東菑田功當及時浹旬雲霓望屯膏胡弗施焦土
成石田荷鋤亦奚為禾秧日以槁桔槔日以疲祈甘司巫
死但令行道悲火龍動訛言旱魃劉群黎山叟不聽講畢
星水氣離比屋多青病何可仍荐饑三復雲漢章恫此靡
孑遺人旱詎有因陽亢胡獨罹巨室充積倉老弱皆鷹鷲
貧者就溝壑富者亦傾危藿食甘枵腹杞憂徒自嗤

七言古

題謝思忠西湖圖送其從孫遊擊赴任武林

昔遊武林泛西湖今見西湖入畫圖滿堂紫翠如可即却
憶丹青不我誣飛來一峰復飛去偶與縹緗忽相遇蘇堤
縹緗六橋煙岳墳彷彿棲霞樹天竺參差窺海門洞中誰
復呼清猿遊騎相先渾欲語酒船競發還疑喧九里松孤
山鶴月巖明月常不落君今宦遊向西湖選勝惟須按圖
索楚人忘弓楚得之何須賭墅借圍棋東山自是君家物
安石風流端在茲

讀王長公元美哭弟詩作此寄慰

予昔春明哭弟時東風早折庭花枝君今哭弟鳳城裏鳳
凰臺空魯麟死予弟無兒復數奇君弟貴有麒麟兒雖云

天數同歸盡足慰目前良在茲予弟初亡夢來頻夢中不
異醒時真請君破涕枕席上未必琴亡夢裏人

巫山高

巫山高高湘水深美人一笑千黃金登高送遠淚沾襟夢
魂不來傷我心屋梁月落夜沉沉空堂不聞瑤華音

感米

世人盡笑於陵子三公不易井上李何如金馬東方氏二
十萬言一囊米江南米價如湧潮潮落米價猶然高先生
筆耕甚寥寥一家數口空嗷嗷

感事示兆通

大丈夫不為甘羅十二卿即為陶朱五湖遊安能矻矻事
佔俾白首握珠猶暗投昨有客從南都歸傳聞風浪生棘
闌勸君息肩戰藝場從我逍遙白雲鄉

為吳黃門公美題錢山人叔寶畫

雪川丹青推舜舉百年耳孫步厥武興來弄筆做松雪雲
白山青宛村塢石梁策馬覽春暉綠楊一帶映朱衣御溝
澄碧照清影想見仙郎入瑣闈

胡元瑞見過走筆奉贈

傳聞卧病維揚者走使南都報司馬趣徵椽筆傳生平不
意生還過吳下江干倚棹訪蓬蒿春暮畏寒猶緼袍病骨

巖巖氣逾壯入門大叫驚兒曹為君開尊相勞苦讀君新
詩欲起舞長卿消渴休文瘦別有肝腸勇如虎歸來未可
歎迷津且着斑斕歡二親仲舒自有天人策他日一鳴驚
世人

子如見過慰之

燕寢凝香晝初起投刺扣扉者誰氏疏陳北闕推直臣詩
讀南陔稱孝子憶昨奪官來過予劇談抵掌何舒徐自言
失馬乃成福獲奉嚴親歡有餘今來憔悴涕如雨雙眸赤
腫不能覩斬焉哀經未去身望門九頓不辭苦誰云賢者
不可測欣戚之間識賓主邇來輿論辨薰蕕推轂雲間應

拔尤計日銓曹勤起廢會看綸綽賁松楸

昆吾行奉送按臺濟寧李公復命還朝應丁少叅命
任城使君古昆吾發劍即剖長洲符身親盤錯試利器廉
聲先已歌萊蕪三載恩威蕪召杜一夕書傳詠何怙十年
長繫兆庶心脫穎臺端天尺五江南水旱連三秋民瘼應
深當宁憂省方簡命下閭闔三江震澤成春流到時已
獲隨車雨棲鳥即是甘棠樹豈惟激揚如運斤還見仁恩
寓持斧吳黎待哺方嗷嗷往來胼胝獨賢勞百城涸轍藉
膏露四野民誼騰桔槔昔年陶冶伊誰始叅知少宰元同
里今日福星一再臨却似當時計桑梓秋風倏已及瓜期

寇君不借人怨悲江上紫烟催祖道日邊驄馬佇褰帷
硜硜尾尾慚猶昔折節叨勤問山澤漫詫歛音寄衷素風期
敢謂雲泥隔雙龍已見合延平畫繡偏宜竹馬迎施澤於
民嫌未久願言前席問蒼生

五言律

荆溪返棹示星兒

一自息機後已非行役身矧伊應結網當我罷垂綸
經雨花全濕迎風柳漫新所欣春酒熟歸壽北堂人

廢將

意氣感投醪生平付寶刀玉門三尺雪鐵甲一綈袍
苦戰

風塵暗論功霄漢高祗今惟血淚清夜泣龍韜

題清卿大樸圖記

大樸獨紛披玄亭對結茨雖遭匠石顧猶是斧斤遺
將及靈椿壽應存古栢姿無論寄山澤自足蔭群黎

沈處士

未尋獨行傳已見古人心偕隱耽蓬累逃名醉竹林
過門猶荷簣入座即鳴琴何必嗣宗和嗃然鸞鳳音

仲氏笑予憂食賦此自解

我亦欲行樂但少辟穀方白盡枕上髮不充釜底糧
淵明謝五斗東方惟一囊俛仰至情係安能如首陽

賦得瓊岳送王孝廉計偕北上并致懸弧之祝

海岳鍾靈候公車薦剡年綵雲浮震澤旭日暖藍田獻璞
應收楚登臺快入燕須知大廷對無敢在王前

病後數過友人

萬事且隨緣河清豈待年有愁俱是障無病即為仙幸得
東籬酒寧論負郭田溷公知不厭聊復一陶然

混跡

混跡可容容膏明已戒龔浮生宜一葉足用藉三冬世態
朝觀種年華老種松時人好譏鳳吾道自猶龍

送吳黃門公美奉使還朝

使節曉乘潮仙舟別望遙春風折楊柳計日入雲霄民瘼
悲鄉國臣隣耻聖朝嘉謀應草就知是採芻蕘

賦得澗溪

不競揔輸君悠然魚鳥群滄浪俱可濯涇渭不須分入夜
深浮月因風淺度雲雖無舟楫用亦自渙人文

送宋明府移家海虞

官箴本無玷直道自難容即拜恩非薄還家橐已空數椽
卑息鷄一水信征鴻賴有君卿在猶能養呂公

送韓甥景魏以醫遊京師甥為襄毅公後

似舅宜藏拙繩先自出塵捧書投父執懷刺倚門人拂袖

江干別揚鞭柳色新須知見垣者應不歎迷津

懷毛孝廉肇明

策蹇走風塵歸與已莫春有才堪脫穎無路即迷津按劍
誰稱屈投珠自為貧寧論棄繻事且慰倚閭人

懷胡孝廉元瑞

北闕辭明主東岡守故陂看花慚却詵落第似丘為天濶
冥鴻遠山長去馬遲何時共尊酒散髮坐臨池

贈別趙郡理仁甫

趙璧自連城何嫌水至清池陽三尺在江上一帆輕左次
緣官謗先驅藉政聲達觀隨宦拙不惜慰逢迎

送劉汀州入覲還閩

郡理舊平反重來五馬尊三年將奏最千里覲臨軒綵鷁
迴汀浦雲旌出薊門漢廷推吏治未許借劉琨

久旱米價飛涌得雨志喜

未雨空煩禱方來不俟求沛然露竹樹時若潤田疇雲起
神龍奮風行溽暑收寄言閉糶者天定勝人謀

憂米

農望絕菑畬饑殍計復踈况無田負郭寧免釜生魚數口
已不足三冬空有餘侏儒應大噉今并一囊虛

立秋前一日得雨志喜

虞賓堂續集卷之五
薄暮歛雲峰迎秋雨勢濃未論催一葉猶可慰三農大火
乘烏鵲甘霖報土龍所欣支枕聽簷溜雜踈鐘

送陳郡理應召入京

郡理雄吳會徵書下楚材應持青萍劍獨上黃金臺夜月
江潮湧秋風片席開寧親知有便征旆莫相催

為沈罔卿純父寓題綠尊館

卜築繞清流開尊日勸酬心持三瓦戒興寄五湖秋倚醉
歌梁父臨風戀子牟莫嫌衣帶緩其柰廟廊憂

送顧明府赴任鄆城鄆城為按臺李公桑梓

顧榮吳土望試宰魯門遊花縣三春雨琴堂五月秋民風

醇鉅野潦水淨盤溝白首無煩載儀刑有鄴侯

送徐參軍赴浙

書記重江藩觀濤向海門清時參幕畫妙歲拜新恩夜看
青萍劍春浮綠酒尊須知徐穉榻先已下陳蕃

賦得脩齋贈張國醫

小隱吳中市蜚聲肘後方箕裘綿仲景技術紹長桑無欲
觀名母清脩禮藥王牀頭春釀熟知是橘泉香

哭陳達可

陳名世顯予甥仲子為杭贅婿蜚聲黌校不幸短命作詩哭之

飛鳴方在望摧折若為情愛汝予猶父臨喪舅亦甥泉臺
埋玉潤秬苑失金聲豈必途窮處偏能哭步兵

五言排律

大雪志喜

瑞雪霏殘臘嘉徵兆有年土膏滋旱後穡事卜幾先似月
通宵白疑霜入晝鮮乾元生意動民瘼死灰然縞色千林
變歡聲萬戶傳擬珠還合浦比玉產藍田調燮人謀盡裁
成帝力全絮飛成挾纊鹽撒慰垂涎無待歌黃竹何須長
碧蓮當牕輝玉樹堆砌潤靈護勿問僵衣卧寧論返戴船
祗宜釀春酒擊壤醉堯天

次韻答子厚宗侯

遙憐漢宗子緘寄楚狂人書到成三復光生動四隣雲烟

凌白社風物渺青蘋桐葉曾分晉桃花似避秦求親通子
建垂釣識玄真古道誰攻玉時情且賤珉建安遺駿骨中
壘是前身尉老龐眉在途窮白首新連城懷趙璧折節下
齊民却媿巴渝曲倉皇一和春

七言律

顧禮部弘任宅觀迎春遇雨呈沈郡公

春官門第早春催綵仗迎春帶雨開令轉東皇應布澤民
熙南國似登臺佳人馬上行雲去歌者車前和雪迴莫笑
狂生巾折角為霖貪看使君來

同高時化過周兆通池上北寄兆通

魯國風塵燕市酒
竭來千里不辭勞
故人祿厚交應薄
季子金多位亦高
客舍崩緹三尺劍
天涯涕淚一綈袍
清池叢竹遙憐汝
莫待頭顱添二毛

宋明府將遊浙過予言別贈此

春風黃鳥喚人愁
把酒長林說舊遊
潦倒一官徒四壁
荒蕪五畝只扁舟
途窮已敝襦
衡刺金盡誰憐季子裘
聞說交知多按劍
握中明月莫輕投

清明日荆溪旅懷

罨畫溪頭風雨頻
城隅停舟經二旬
鄉心獨熱惟殘夢
旅食猶寒逢暮春
破被終宵推愛子
斑衣累日曠慈親
路傍

名利豈吾事
池上桃花應笑人

為林江陰壽其尊君太守公

無煩太室覽真圖
仙醴遙應出帝壺
茅氏二龍隨五馬上
池三鳥引雙鳧
藍田種就生烟玉
合浦光搖照夜珠
應有鈞天傳法曲
登歌尾續媿吳歛

仲氏客白下者踰月矣一夕夢杜臧引卮酒進中多

荔枝紀以一律

乘舟訪戴鳳皇臺
客座知啣何處杯
江上久無鴻雁至
酒中安得荔枝來
鱣揚杜簣人難醉
被冷姜肱夢始回
別後已經燒筆硯
西堂賦草媿非才

卧病顧春官弘任周文學懋脩携具見存

經時伏枕掩荆扉二仲相尋興不違溪上酒船行且至尊
前談雪坐來霏顧榮高簡疑龍卧周顛風流亦鳳輝病裏
不堪河朔飲空慚未晚客先回

是日也弘任先至坐候懋脩劇談時事感而有作

輕舸載酒過芸堂下榻風生暑氣涼豈必醇醪借公瑾已
知逸興屬長康病疑痼癖多泉石憂入江湖亦廟廊何日
蒼生起安石即今玉粟是吾鄉

米價涌貴感而作

已無南畝可躬耕敢羨東家委積盈背祗應如仲路折

腰那得似淵明身慵奔走艱糊口智乏竒羸拙養生靈雨
不開滋桂玉須知王掾價難評

立秋後毒熱連日望雨不至

虛教一葉報庭臺流火胡堪又復回不識水雲何處去未
知涼雨幾時來城頭苦憶商羊舞日下番疑旱魃催豈是
暴厄天有意饑民先已遍蒿萊

七夕暑甚

節序相催秋漸深赤龍當御暑仍侵似憐宋玉悲蕭瑟獨
許嵇康懋竹林豪客尚耽河朔飲幽閨不動暮城砧遙知
霄漢雙星會畚笑斑姬團扇吟

送湯文學應試南畿

清明次第發蟾枝更喜寧親定省宜豈必竇林森五桂爭
如玄圃茂三芝麟經入選誇鴻漸鳳里當筵聽鹿詩計日
九成陪舜樂和鳴還擬奏堦箎

題明妃出塞圖

空將淑質付天驕漠漠風塵紫塞遙青草自存胡地塚黃
金莫贖漢宮腰雲中環佩魂難返馬上琵琶曲未調惟有
蛾眉常鎖恨却疑綵筆未能描

題陸中丞北運遺疏

不佞為大宗伯門下士最久習
聞中丞賢方中丞為明經時大
宗伯以司成在告不佞候之而中丞適有田間行
道中丞既貴官九卿大宗伯復謝病中丞給假送

之還不佞下第禮闈歸舟相先後一夕抵房村風
濤相為順逆遂維谷殆甚望前路有燈熒然勉
就之則一官舟已泊舟人相訊始知為中丞舟中
丞亦以通家故呼不佞為夜談顧舟高下懸不克
登遙報謝詰朝各解維中心藏之矣不佞幸為公
家門闈之廝且蒙相勞苦今讀茲疏能無惻於衷
哉茲疏也所謂仁人之言其利溥哉不
佞不能贊一辭湯成四韻以志所感

蚤歲香名漫盈耳虛叨立雪長公門中道相望不相對方
舟昏黑泊房村神交未及緘書徃國計徒聞疏草存豈必
峴山能墮淚不須碑在亦消魂

秋日辭客聊遣病懷

亦知秋色好啣杯藥裹驚心逸興頽結駟任君題鳳去忘
機還我狎鷗來池頭花事寒仍放鏡裏年華雪已催強欲

臨風歌古調獨扶藜杖一登臺

夢贈

山中宰相醉鄉侯軒冕元從物外求避世不知經漢魏入
關何必歷商周桃花屈指三千臘海屋回頭一二籌更欲
尋幽雲夢澤偶逢仙侶岳陽樓

病後携尊城東過沈尚綱書畫舫

木落城隅幽興偏提壺還上米家船多愁自笑如平子博
物何能擬茂先坐愛夕陽宜蕩槳行看天女欲參禪須知
會意不在遠豈必乘槎日月邊

文基聖稀齡誕辰

白首燕臺賦上林歸來未滿橐中金膝前竇桂看逾茂庭
際田荆誼益深通籍三朝身接武稱觴四世酒同斟獨慚
累葉通家者漫奏南山異賞音

小樓

小閣巢雲非世情一從調息萬緣輕窓中紫翠西山入屋
角烟霞南浦平棣萼前開輝几案桂叢後鬱護簷楹謾言
伏櫪心千里茗椀香爐足此生

薛士立使君入賀南還夜過小齋與周兆通同坐適
故年歌者一二人至

使君入進萬年觴歸袖猶携御座香獨抱素心憐契濶不

慶賞堂續集二卷之五
辭促膝寄清狂情深卜夜霜威減興發醇醪玉漏長莫訝
何戡裘總敝故人先已鬢毛蒼

為文子排郡貳介壽

百年族望冠東吳三載芳聲起治蒲未老懸車辭五馬不
須飛舄化雙鳧棣華並進中山酒玉樹相輝合浦珠莫訝
一籌添海屋歲星先已報桑弧

長至病起適吳伯恒方伯書問至

夜長更鼓漫相催支枕頻驚短夢回多病酒杯弓影亂遠
書空谷足音來啼饑幸免填溝壑慰勞遙憐及草萊應是
佳辰陽始復吹葭先暖不然灰

謝趙少宰寄月下白絹

匹練溶溶借月輝須知常布見應稀絲綸恍出鮫人室杼
軸疑從天女機只合黃扉供袞職敢於白屋綴斑衣無緣
拜賜成搔首北斗遙瞻近紫微

吳幼安有弄璋之兆賦此訊之

聞君昨已夢熊羆屈指懸弧喜及期但使參軍得新婦毋
論何物育馨兒珠生老蚌偏宜晚玉產藍田不恨遲朝聽
呢喃梁上語烏衣應為報相知

雪後沈周張唐四郡公携具過小園

報道軒車訪薜園喜扶僵卧掃柴門連珠照夜凌冰檻群

虞實堂續集卷之五
十五
玉成山倒綠尊野菜可留鱸膾與醇醪能挽驢駟轅從知
餘雪須高詠應有陽春座上溫

答宋文學叔意和韻

出處何曾有異同豈於飛伏辨雌雄絕憐弱冠青雲客歲
晚遙傳白雪工夢度九峯吳市近歌來三泖冀群空衡門
不是龍門貴却喜通家刺已通

園梅盛開喜而有作

繞屋遍開三十樹巡簷喜占十分春香生即是羅浮夢色
照都成姑射身風信未催吹笛客花神不負灌園人廣平
已老雄心息作賦徒驚物候新

公瑕携具過小園觀梅湯成一律并邀同賦

小軒高唱鬱輪袍花發春先興自豪未許長庚吹玉笛喜
逢公瑾過醇醪風生短徑清鷄舌日照叢林白鳳毛老筆
定饒東閣賦莫將口吻學兒曹

新正廿三日大雪

去年殘臘餘三白今歲春融忽復來豈是陽和尚濡滯故
令淑氣暫徘徊將舒楊柳看仍勒已落梅花擬再開我欲
乘舟無事訪不妨扶策獨登臺

聞歌重悼子繩

新聲入耳幾何時寂寞於今起夢思不恨少年辭世早獨

虞實堂集卷之五
嫌老眼識君遲雪消蕙草三春盡月落空梁五夜疑絃絕
已無山水意異方之樂使人悲

古意

車如流水馬游龍蓬島瀛洲在九重燕市酒人猶擊筑漢
京豪客已鳴鐘牀頭寶劍千年秘肘後黃金萬戶封總是
天驕塵十丈紫雲常護茂陵松

寄題懋成王孫握蘭社

武昌高館鬱蘭叢作賦應知臭味同神女不須行暮雨大
王元自振雄風邀賓共擬梁園在開酒還教白社空聞道
春來多勝事雙魚急為致詩筒

次韻荅孔炎宗公

天孫尺素慰離憂三鳥來從海上鷗家世栽圭桐葉貴心
期招隱桂藂幽兔園授簡俱神往鳧渚浮舟亦卧遊門下
應劉知不減喜傳新藻下滄洲

五夜枕上漫作

鴈燈殘焰半明樓夢破虛窓宿靄收風動五更花作雨寒
生四月麥成秋壯心未已空悲驥短褐難逢只扣牛病起
荷鋤稀種藥祗須萱草足忘憂

次韻荅趙仁甫郡理

憶昔池陽渺十洲素書曾寄亦沉浮高山有意憐同調明

月何須歎暗投塞上風塵驚失馬酒邊談笑狎飛鷗北堂
共喜靈萱茂日夕承歡足解憂

已丑夏五大旱撫臺周公虔禱不雨按院李公將至
先是戊子秋旱李公下車即雨

舊雨隨車直指功今年亢旱豈無同中丞未協山間夢少
女空占樹上風澤涸桔槔何所用川枯舟楫詎能通漢陰
抱甕本吾事汔至其如井養窮

喜雨

經時旱暵苦炎埃薄暮涼風送雨來仰協畢星占水氣頰
徵封蟻對雲臺千林濯葉回春意萬戶歡聲殷夏雷已卜

嘉苗雙穎合呼兒先遣一尊開

感民謠作

漫論粳稻自東吳天子憂勤言有無作雨空勞賢宰相
蠲租不獨大司徒三江碧浪全疑陸萬頃青苗半欲蕪聞
道民謠須柱史隨車何日慰來蘇

凌錦衣護從 潞藩之國便道歸省還朝贈之

帝子分茅出薊都侍臣銜命護雲衢輝承棣萼添行色澤
溢天潢潤使符驛路饌鈞青玉案名藩禮重執金吾歸寧
莫恨王程促環衛方須照乘珠

新都有客自東昌遷居上海

新都豪俠客東昌攬勝江南逸興長三泖烟波湖上棹千
金寶劍橐中裝洪崖徙宅開新賞葛稚移居即故鄉聞道
華堂多瑞氣已知賀燕在雕梁

七夕得都下書時廟堂方以視朝為請

嵯峨金闕仗經綸千里音書問鈞緝此夕彤廷延鳥使幾
時絳幘報雞人江南旱潦關民瘼塞北烽烟探虜塵莫笑
杞憂深廟畫古來藿食是閒身

贈別顏國相范卿

平原家訓足名家况有縹緗富五車官比江州白司馬遷
同洛下賈長沙三都詞賦千秋業萬里遨遊兩鬢華聞道

乘潮應挂席須知八月是仙槎

賦得黎川晚霽題沈山人冊

老去休文小隱賢風流標格至今傳百年世賞黎川勝一
縷心香梵宇偏潦水烟光猶漠漠落霞飛鷺自翩翩蓮臺
更有遺容在好證三生石上緣

送沈清卿入京携令子同行

殷勤挾纊一綈袍江畔驪歌感濁醪水淨雲川卿月迥雲
開帝座秩星高長河挂席青簾舫驛路傳經白鳳毛想得
離宮出遊處春嘗知欲獻櫻桃

劉太學枉顧有作報之

輝輝玉樹出中庭須信名家有寧馨多病馬卿應是渴少年劉向已傳經閉門愧我頭先白傾蓋憐君眼倍青三徑掃除知不負草堂昨夜帶文星

李夫人

舊事西京闕九重香銷別殿鎖芙蓉椒風一捲龍鬚席桂月頻窺馬鬣封草宿故宮誰協律苔深戚里不鳴鐘帳中忽見依然去腸斷朝雲十二峰

題蔣太守玉蟾山新阡

一丘何必按青烏三徑先徵夢玉魚道士無煩厭龍虎仙人已為化蟾蜍滕公石槨千年室原氏新阡五馬車地脉

定從方寸得應教吉壤屬元輿

贈吳二習甫吳為沈啓南氏外孫

道子箕裘屬後人相城宅相發君身解衣盤薄自能事簪筆苦辛還絕倫無意信今可傳後有時擬古即成真百年將半已如此會見老來猶入神

秋晚池上

池頭秋晚一婆婆身外浮雲柰我何最喜向長婚嫁畢不須陸賈橐裝多松筠亦可成蹊徑魚鳥元非罟網羅湯說輞川饒勝事城東別自有維摩

有感湯作

從知酒肆好藏名滿眼升沉一達生幾見桑田經海變可
容人壽待河清三江市隱同梅福五嶽神遊亦向平短髮
不須羞破帽已將蘿薛作簪纓

贈曾孝廉人倩下第春官歸

竭來萬里倦遊身賦就三都兩髻塵嶺表容君重結網江
干媿我老垂綸到時雪涕過殘臘歸路風雩及暮春計日
飛鳴應可待佇看挾策對天人

分得震澤為李使君賦

包山北望眇東阿雲樹連天紫氣多壁立數峰俱砥柱汪
洋萬頃盡恩波隨車時雨孚輿論動地春風起權歌不是

九重慳借冠彤廷方欲待鳴珂

夢文太史公寄予扇頭詩覺後次韻

三鳥街書出玉京一緘重見故人情扇頭翰墨新題字天
上脩文舊策名此日鴻冥慚後輩昔年龍卧憶先生閉關
已謝西州路腸斷寒宵短夢成

葉處元諫議書儀見存

私車久已謝追隨夢冷長安躍馬時豈為平津開閣晚自
緣魏勃掃門遲支離生計餬予口粗糲儒餐媿毋慈青瑣
故人勞見憶雙魚忽下鳳皇池

鄭思成戶部以詩見示奉贈

使君幽興託風騷逸思翩翩付綵毫通籍十年應宦拙齋
糧千里亦名高經綸自世弓裘業出納猶親案牘勞谷口
不須猿鶴怨池頭方惜鳳皇毛

石湖會葬魯望志感

石湖風物使人憐故賞心驚石上綠寬博十年居士服煙
波一棹孝廉缸眼中鸚鵡生前酒望裏牛羊墓上田湯說
中郎家學在豐碑誰為勒原任

五言絕

季布

古人推季布一諾千黃金今人重然諾應存季布心

風露

風過書動几露滋蛩吟壁風露自無情亦足破岑寂

平康曲

昨日君憐妾今朝妾憶君空令淚如雨不復夢行雲

讀高禮部饒刑部疏

奕世掌絲綸皇恩重鼎臣須知折檻者不是掃門人

古意二首

刺繡妾應留行役君須去朝來春鳥鳴却是傷心處
妾命風中絮君恩水上萍命於恩比薄不得怨卿卿

春遊

春花不浹旬春晝忽以夕急須秉燭遊况乃婚嫁畢
徐少宰寄示義田役田帖

敦睦仁恩洽均徭義澤流須知登鼎鉉博施徧神州
周令君示吳縣緩徵帖

次第催科政申重渙汗文寄言諸父老不得負神君
景魏自荆溪歸亡其愛女阿泰慰之

敝刺懷歸晚空山瘞玉深須知金瓠戚應作棄瓢心
七言絕

題休承張公善權二洞圖

披圖溪上物華新舊雨凋零三十春百里名山身不到神

遊八極是何人

贈妓并戲主人

穠粧嬌臉出當壚我見猶憐况老奴只恐明朝又中聖風
前且莫舞瓊瑜

白頭吟

琴心昔日試成都那得邯鄲事獨無若說相如情不薄還
來一問舊當壚

題唐解元杖頭錢小幅

溪流一曲足風烟鹿夢初驚野興偏莫謂錦囊惟繡句杖
頭還有買山錢

添字集句

誰云死別已吞聲腸斷看山獨送行一自曲終人不見至今嗷嗷夜猿鳴

豪飲

當時豪飲竹林同投轄何須陳孟公寂寞於今成獨醒空樓支枕月明中

題鴉鵲圖

鴉鵲聲中辨吉凶鴉鳴鵲噪若為同須知禍福常相倚不信還觀塞上翁

七夕

歡娛何暫恨何長一夕空勞渡鵲梁不若從來不相見須知牛女羨參商

懷子繩

平臺酒次芙蓉月曲沼歌邊楊柳風一自逢山徵協律祇今惟有夢魂同

又早得雨適按臺李公下車

片雲信宿望全無一夕歡騰涸轍魚御史自來推決獄到時應有雨隨車

白露日夢俞僉憲士立

白露橫江秋氣催使君歸未夢先來經年儲得牀頭酒計

日還傾花下杯

樂毅

昔年樂毅自魏往今日封書從趙來假使郭隗身尚在應知悔上黃金臺

殘編

東方讀書一囊米劉向傳經三十年老去未能燒筆硯閒來時復檢殘編

塞上曲二首

傳聞天子勒燕然正是呼韓款塞年為語胡兒休牧馬只今飛將欲臨邊

邊庭車馬獨閑閑萬里黃雲閉玉關湯說匈奴射鵰手停鞭揮淚過陰山

逃亡謠

兩年逋負一時償更有催租吏下鄉漫道秋成堪作樂相傳長策是逃亡

設小坐於家人出入處解嘲

斗來一室僅容膝掃去萬緣成鏡機湯學監門抱關者不同空谷足音稀

感事

已夷舊宅鞠為田未葬荒丘生野烟昔日孟嘗門下士河

濱別候入京船

奉和趙少宰賦靈洞山房十二景

然藜鳴玉紫宸朝別有烟霞洞壑饒綵筆只今干氣象翠
微應見赤城標右古洞棲霞

雙開玉鏡戲銀蟾不待珠光夜色添應是五樓懸倒景千
秋常挂水晶簾右天池漾月

躡磴梯巖四望周孤高不許衆山伴白雲何必重回首紅
日應須近舉頭右中巘干霄

誰移海上玉芙蓉環繞羅關三兩重欲問飛來自何處巫
山今作九疑峯右三山環壁

豈必縹緗富石渠洞雲深護鄴侯書何當負笈尋真去問
字還來辨魯魚右石屋藏書

翠微寒澗激琳瑯疑有牙琴奏石牀礪齒不須重洗耳清
朝元自待含香右澗泉漱玉

片雲忽過楚王臺授簡應誇作賦才莫訝無心還出岫九
天霖雨待君來右片石飛雲

冰崖飛霰鎖璫枝想見袁安僵臥時莫道陽和易銷歇孤
高常駐歲寒姿右璫崖積雪

滂憐蕭索百愁生古寺踈鐘雜梵聲大小若為隨扣應東
隣今是舊司成右梵刹鐘聲

虞實堂集卷之五
孤亭山半息歸樵相對都忘山徑遙莫怪夕陽噓笑語主
人元不厭芻蕘右山亭樵語

笙簧隔水奏松風曲徑巢雲鳥道通正是熙朝須碩輔豈
容弘景在山中右雲徑晴松

一行濯濯帶烟汀雨過溪橋春漲平誰道千秋彭澤柳風
前曾寄上林鶯右溪橋烟柳

戲示筆工

多着毫毛少着麻牢椿斑管莫欹斜但將紙上供行草不
用庭前掃落花

傭書

君平賣卜頭應白季主垂簾思獨玄莫笑傭書殊鄙事積
錢亦可助烹鮮

殘梅

交加玉樹半離披彷彿羅浮夢斷時莫恨風前易零落孤
標還駐歲寒姿

西山種松二絕

萬壽神宮紫氣重廷臣交疏辨來龍金臺桃李無人植盡
向西山學種松

明詔採松期六尺庭前丈五作龍鱗須知種樹猶如此莫
笑馮唐易老身

題馬姬畫蘭竹

竹翠蘭芳身外身
湘波曾待月傳神
秦淮別有濡毫處
豈必崔徽解寫真

白鷗

曲池曾借一雙飛
淺水蘆花見已稀
何事滄江偏易狎
烟波深處自忘機

園亭春暮

小園三月物華新
寂寂池亭生網塵
一任桃花自開落
已無歌扇度陽春

小齋春暮

沉香緩蕪紫烟生
槩几蒲團無世情
支枕不知花落盡
起來惟見綠陰成

汎舟

蘭橈桂棹泛菰蒲
雲白山青酒一壺
到晚何妨隨處泊
風波元不在江湖

雨中池上

知魚何必俟蒙莊
驟雨新波錦鬣張
永日捲簾池上坐
悠然吾與爾相忘

為人題素綃二首

織就巫山一段雲
千絲萬縷若為分
別來紅淚知多少
點

點從前說與君

冰統一幅奉晨昏不待迴紋亦斷魂此去若儂新粉面須
知曾拭舊啼痕

戲問茂實

聞君聽講學參禪我獨拋書日午眠君罷講時吾睡醒不
知真覺屬誰邊

題秦嶺吹簫圖

豈是吹簫近五城曲終身已在瑤京一從鳳去無消息夜
夜緜山空月明

榴實

小庭秋入火西流滿眼繁枝實海榴笑口齊開報多子須
知滾滾出公侯

夢中口號

隔簾聞說謫仙才入座龍團止一杯正是相如病消渴金
莖玉露自天來

分詠瀟湘八景得山市晴嵐

霽色朝開紫翠繁千家貿易動村村洗粧村婦看山出不
是城中倚市門

營肉食未得自嘲

劉郎不得子鵞炙畢卓何緣持蟹螯老我未能安藿食擊

虞實堂續集卷之五
鮮猶欲溷兒曹

紀夢

當時相對已忘情此夕相逢意獨傾
自向夢中酬一諾不須石上證三生

已丑秋日鴛鴦再歸二首

看花不羨宜春苑避暑應過銷夏灣
自去自來如有約年年秋入薜蘿關
太湖三萬六千頃鴛鴦七十二成行
誰謂曲池惟半畝烟波亦自足鷗翔

題群仙拱壽圖

西池王母讌群仙南極流輝寶婺懸
何必人間論甲子即看桃熟已千年

題停車圖

倦游無乃似相如牛角疑懸後漢書
清世豈無人勸駕秋林容得爾停車

入邵園

東陵老去有聞孫愛客池頭晚命尊
不道野人貪看竹扶携突入辟疆園

蟹

霜落田間禾黍饒爭持一穗夜趨朝
沸曹正是橫行處不

道江干障緯簫

即事三首

黃扉石畫賑蒼生青瑣嚙書走百城郡邑大夫歡帝澤壺
漿何惜夜逢迎

文鏹趣出建康城內帑無煩發大盈官吏下鄉行賑令石
壤雞犬不須驚

天王德澤下蓬蒿發粟應知出鉅橋信是漢廷長孺節不
須比屋問延燒

題秋江待渡

江豚吹浪沸洪流颯颯寒蘆十里秋滿眼風波行不得岸

傍閒却濟川舟

鶴鶉

安居不待問蒙莊信是無常却有常喙翼何須田鼠化已
知七宿耀南方

楊梅小鳥

絮絮朱實滿喬林風味何如荔子深却笑踏枝爭食者看
來元不是家禽

可中亭懷子繩

當年絕唱屬秦青一曲渾疑理鳳笙今日亭中點頭石不
知可得證三生

鵲鴿

紅蓼蕭蕭野水湄
斷腸應憶在原時
若為布粟成謠後
復有陳王煮豆詩

雪中嘗金陵陳簿寄惠香菜

謝庭玉樹撒鹽初
委巷袁安僵卧餘
若謂故交俱冷淡
糝鹽誰寄甕頭蔬

題嚴灘圖

雲臺勲業眇誰倫
豈獨椒房失老臣
惟有桐江舊時月
一鈎常繫漢經綸

詞

愁花令

花不開時花未好
待得花開騰得春
多少凭闌欲作賞
花人難教花知道
又怕花嫌人老
雨慙風儗烟啼霧嘯醞
釀一春懊惱想司花
吏年紀小愛調未
諳曉把花信都顛
倒

滿江紅 自遣

負郭良田營數頃
竟成鳩拙儲擔石
所供饘粥僅充旬
月任待哺一家交
遍謫勝含饑萬戶
爭啼血筭生涯五
斗不難求腰難折
萱草茂蘭芽茁烹
蟹眼燒雞舌正綠
肥紅瘦清和時節
餬口莫妨開口笑
達生自與謀生別
看當年

虞實堂集卷之五
綠鬢鏡中人今成雪

風光好二闕 悼子繩

惜芳年痛芳年綠鬢仙郎何處仙使人憐與君世世為兄弟難拋棄重結來生未了緣夢中天

鳶何親蟻何親回首山頭不見人夢難真尋常一樣窓前月成永缺大家携酒哭青春獨傷神

青衫濕 虎丘志感

鐵花巖畔千人座何處挹餘芬舊時酒次風流標格化作行雲恍然在望清温衛玠白練羊欣當年聞笛山陽出涕未是消魂

青衫濕二闕

空梁月落無顏色不復繞清歌火烈西崑珠沉北海夢斷南柯調高絃絕周郎誰顧空復婆娑排愁破涕憑誰處置一付維摩

嚶嚶夏木黃鸝轉未足比清謳水逝無波雲歸失影月落沉愁勝會不常盛筵難再湯自追求臨文嗟悼憑誰處置一付莊周

如夢令

漫說栽培傾覆自合參商卯酉時序有春秋那得賞心長久絕口絕口情到不堪回首

履實堂續集卷之五



